

fortiter declivi, elongato-triangulari; membrana areolis elongatis, areola majore angulo interiore apicali recto vel leviter obtuso. Orificia metastethii rimam tenuem transversalem marginatam formantia. Coxae anticae breves, medium mesosterni haud attingentes. Pedes graciles, longiusculi, femoribus linearibus, tibiis omnium tenuissime spinulosis; unguiculis a medio tenuibus, subito fortiter curvatis. Terebra feminae brevis, medium ventris haud attingens.

*Ambrocious* Stål, Bidr. Rio Jan. Hem., p. 59.

Typus: *A. Dufouri* Stål<sup>1)</sup>.

### *Ambrocious capucinus* n. sp. (Fig. 13).

Corpore inferne, capite scutelloque piceo-nigris, laevibus, nitidis, ventre tenuiter griseo-pubescente, disco in pallide testaceum vergente; pronoto latitudini basali aequae longo, obscure griseo, dense fortiter impresso-punctato; hemielytris griseis, pellucidibus, embolio venisque membranae piceis, hac grisescenti-fumata, macula ad apicem cunei hyalina; orificiis metastethii albidis; antennis nigris; rostro pedibusque flaventibus, femoribus apicem versus infuscatis, tibiis ima basi apiceque cum tarsis nigro-fuscis. Long. ♀  $4\frac{2}{3}$  mm.

Caracas, unicum specimen.

Caput vertice oculo fere triplo latiore. Antennae articulo secundo primo circiter quadruplo longiore et margini basali pronoti fere aequae longo, tertio secundo paullo minus quam duplo brevior. Pronotum apice latitudine basali circiter  $\frac{4}{7}$  angustiore. Hemielytra pronoto paullo minus quam triplo longiora.

## Div. *Dicypharia* Reut.

### 27. *Parantias* nov. gen. (Fig. 14).

Corpus oblongo-ovatum, convexum, glabrum. Caput basi pronoti duplo angustius et apice hujus sat multo latius, laeve,

<sup>1)</sup> *A. phaleratus* Stål generis *Fundanus* Dist. est species.